

Les vants et la tounoûre a Bîve.

Gaston LUCY – Y.J.

Les vants su rèpartichat insi, cand is vnât du :

- Nord BÎJE.
- Nord –Est HYÔTE BÎJE
- Est SOLÊ L’VANT
- Sud - Ouest LORIN.NE.
- Sud MIDI
- Sud – Ouest FRANCE
- Ouest COÛTCHANT
- Nord – Ouest SCWÂTCHE –VÊ (*écorche-veau*)

Lu Nôrd est l’afwêre du Djan-Bîjon (*Jean de la bise*). I r’san.not, pou les vîs, a in vî oume, bin amitouflé,ki n’avot jamwês frêd. Sa bzougne, c’ére du choufler dul fine nîve p’âs trôs des hâyes et dins les tchèrâs (*chemins encaissés*) à nètiant les tchamps bin à l’êr. Il avot in caractère à fwêre des niches âs oumes. I g’avot k’à dire su nom âs afants pou les fwêre choûter (*obéir*) ; ossitot, Djan-Bîjon arivot hoûler dins la tch’minée (*hululements de la bise*)

Djan-Bîjon n’ére jamwês tout seu. I v’not avun ène bande du « Pinç’rons » ki vnint du frêd, mês k’on n’wèyot jamwês. Avu Djan-Bîjon, c’est zès ki v’nint, a l’iviêr, pinçi les dêts (*doigts*), les dôyes (*orteils*) les orêyes, lu dbout du nez et tout l’rêsse.

Cand is vnint dul hyôte bîje (N.E.), ils astint co pu mècheants, mês ça n’dèrot nin tant. Mês cand les nwâres bîjes de mars arivint pou r’souwer (*assécher*) lès tères, c’est dud’ là k’is vnint ossi.

On dit ossi ku c’n’est nin zès ki fjat l’pus d’tôrt âs fleûrs des ôbes, mês putot l’solê ki loût s’la djalée. Ça n’arive nin cand l’timps est covru. On dit ossi ku la blanche djalée dumande a z-awè l’cu r’lavé. C’est don signe du plûve.

Les cîs ki vnint du N. – O. su loumint les « scwâtche-vês ». Il astint si mècheants ku, si jamwês on lâchot in vê û in bèdot tondu cand i chouflint, ces biêsses-la russintint l’frêd coume si on lz’î avot aratchî la pê.

Pou ç’k’est du coûtchant (O.), on z-è toudi r’marké a Bîve, ku les walées (*orages*) ki vnint dud’là su pârtint toudi à deus (*se partageaient*) dzeu les Raÿmonts et passint à costé du viadje Si çu n’ére nin l’cas, on plot z-êsse chûr du vèy tumer la tounoûre su les mâtjons.

Lu vant du Midi û d’ France est brâmint pus doû et bin mèyeû pour les danrées des tchamps.

Cand il est à Lörin.ne (S. – E.), on dit : plûve cèrtin.ne.

Les vîs djint ossi ku pou z-êsse bon, lu mièl duvot awè sté carèssî pou vant d’octôbe.

On djot ossi ku les pus mâvêzes walées à tounoûre (*foudre*) vunint d’bîje, surtout cand iles rumontint l’vant.

C’est ossi les walées à tounoûre ki markat les sêzons.

On dit ossi ku c’est les djans nêrveus les pus sudjêtes al tounoûre .

On dit co ku la tounoûre tume 95 còps su l’êwe po in còp s’ la tère.

Pou ç’k’est dul’ lune, on dit ku l’timps dul nouvèle lune dère toute la lune.

Pou s'garanti dul tounoûre, on r'coumande :

- Du fwêre in signe du crwâ à tchèke alumwâre ;
- D'alumer ène tchandèle k'è sté bènne al Tchand'leûr ;
- Du priî Sint Dônât ;
- Du pinde sun' imâdje dins les stôles ;
- Du piker in brin d'pôkète dis les môyes (*meules*) ;
- Du s'mète dzous èn' blantche supine (*aubépine*) û ène boûle (*bouleau*) ;
- Du fwêre in feu avu bramint d'fumîre.
- Du s'sâver des grands ôbes et des ustyes d' fiêr ;
- Du clôre les uchs pou z-éviter les courants d'êr.

ON DIT CO :

- Ou moumint dès djiboulées, : Vla co l'solê k'à r'tchâfe yène.
- K'i n'fât nin sgrignî l'solê (*le regarder de travers*) à ç'sêzon-la, c'est des tours pou k'i s'catche lu rèsse dul djoûrnée.
- Ku la lumîre dul l'lune fwêt toûrner l'tchèrbon à rin. (Pour mi, c'est putot l'alternance du solê èt d' plûve, èt c'est co pus vrê pou lès briquettes de lignite.)
- K'i plût d'pus dul nute ku du djoû.
- Ku les pîres (crottes du tchin) k'on trouve les trôs d'sâbe (*carrières de sable*) ont sté fwêtes d'in côp d'tounoûre.
- Ku les alumwâres du tchaleûr (*lueurs soudaines et brèves*) k'on wèt al campagne (*en été*) fwârt bas et fwârt lon, sont in signe du tchâleur. An walon, ça s'dit : « Sourloûter ».
- D'après les vîs, cand l'solê est roudje sang ou coûtchî, c'est signe du guêre.
- K'on z-ârè in fwârt iviêr cand les marichôdîs amonç'lat bramint des spines du sapin su leu nik'.
- Cand on z-è l'iviêr duvant l'Noyé, on l'è deus cöps.
- Ku la lune est farôde (*coquette*), pask'ile su wête souvint dins l'êwe.
- Des ôtes dijat ku c'est k'ile è peûr des pwissances ki li a vlat, èt k'insi, iles nu savat pus la ké k'est le boune.
- K'i gn'è in spot ki dit : « Chitoû coume la lune ».
- Ku la lune su loume souvint : « Solê des leûs ».
- K'âs Avants, lu tchant du cok nu vut rin dire, pask'i tchante tout l'timps.

Gaston LUCY.

Rutapé pa Louwis Bêdjot, lu 10 Mars 1999.